

四庫全書

集部

欽定四庫全書

勤齋集卷四

元 蕭軒 撰

雜著

地震問答

歲在癸卯八月辛卯初夜地震汾晉尤甚湧堆阜裂溝渠壞墻屋厭人畜死者無數延慶次之安西又次之餘尚未聞也至今月餘猶若乘舟車然間復一動民皆廬於空庭市道以火繼晝不可禁惴惴焉莫能寧處閭巷

焚楮幣告謝者無日無處無之姦人間為利詭言相驚
民深以為患有問於余者曰某將有禱於天地而或謂
此地動也何關天事又紛紛之言不可勝記某亦不之
聽信但未知此何祇之所主何以為辭而禱之如之何
其可余聞之曰吁人之不學乃至此乎此其所以有此
大變異也歟天地人一也豈有二乎天包地外地居天
中人生天地之間受氣于天受形于地乾為父坤為母
故人之一身氣則天也形則地也心則人也故禮記曰

人者天地之心也邵子曰一身還有一乾坤豈有二乎
人而不知天地猶自心不知其血氣形體猶子不知其
父母之心也何以為生耶曰天如何而包地也曰僕聞
之天積至陽輕清之氣耳其為氣也至剛至健旋轉至
急故包得地居其中地則氣之至陰而重濁者積之而
後成形質然其初本一氣也動則為陽靜則為陰陰陽
分則兩儀立雖曰兩而實未嘗相離也故曰天地自相
依附天依形地附氣也子不見夫日月星河之出沒乎

隨天運轉從地下過耳此最明白又何疑焉曰天地其變如此何也曰失其理也如何而失其理曰由人而失其理也人者天地之心安有心病而身不病者乎曰理如此其大乎曰昔宋太祖問世之何者為大宰相趙普對曰道理最大雖天地各有其理而況於人乎請備言之曰聞之天之理曰乾地之理曰坤故乾健而坤順乾動而坤靜乾剛而坤柔乾發舒而坤生成之乾覆燾而坤負載之人之理曰仁義禮智信所謂天地之中民受

之而生若仁者愛之理也義者宜之理也禮者敬之理也智者別之理也信者實之理也此人之性也亦曰人之德也蓋此理得之於天亦曰德性也故仁之發為怵惕惻隱之心義之發為羞惡之心禮之發為恭敬辭讓之心智之發為是非之心信之發為誠實之心此人之情也仁則為父子之親義則為君臣之義禮則為長幼之序智則為夫婦之別信則為朋友之交此人之道也蓋是為人當行之正道萬世不可改易者亦曰人倫者

也又推而言之則凡孝愛慈祥和易寬惠粹溫醇懿公
恕周溥宏裕安泰容育彊健剛毅果決勤敏紓徐哀矜
施卹仁之屬也文理節序謙抑宣章嚴威祇惕慎畏齊
莊卑巽禮之屬也裁制宜適友悌方達斷直從順擾肅
廉介義之屬也密察精辨清明開爽睿哲聰覺達淵貞
正確固專栗縝密儉約智之屬也恒一守忠敦篤純質
愿樸厚重孚塞懇悃鎮靜恬夷信之屬也凡此皆人之
理也或乃凶賊慘忍虐劉傷害酷虐禍敗狂猛獷悍躁

率媚疾忌忮貪頑私比狷褊隘狹偏駁輕忽弱懦仁之
反也驕矜夸盈僭忒奢溢急肆滔淫侈亂黷冒攘奪鬪
鬪號訇爭伐陵競侮傲惰放蔑慢戲侮荒弛吝嗇鄙俚
義之反也殘暴悖戾狠愎偏黨苟覲容媚拂訐隨同疑
爽姑息禮之反也猜蕩幽暗昏昧窒塞傾邪陰險蔽係
滯吝愚惑繁苛瑣碎愁戚闊疏粗略混濫陷溺卑污遂
非億詐智之反也妄誕矯誣欺詐詭譎狡偽諂諛空曠
儇薄便佞便辟信之反也凡此之屬皆非人之理也蓋

人之理其大者為五常其細者有萬善反之則皆為惡
名數不可盡舉此大略也又雖曰是理而施之不當其
可則為惡矣如愛與敬理也若不愛敬其父母而愛敬
他人則謂之悖德悖禮以此為例而推之可徧通矣故
凡為學之要於一言一行間不可苟必務去惡而存其
善夫子謂言行君子所以動天地也可不慎乎曰聞之
致中致和天地位萬物育者何也曰此聖人之能事學
問之極功未易言也若粗言之不過使天下人之心一

靜一動各盡其理爾人盡其理則人道立故天地自位
天地位則萬物育亦猶人心安泰神志清明俯仰無愧
則氣血和平膚革豐盈化化生生壽考康寧矣曰此在
位者政治教化之事匹夫空言何益哉曰此童蒙之見
也夫治民而教之自秦漢以來此道廢矣然自此民物
之休戚亦可考矣尚何言夫人之有生得天所賦之理
方有此形既生為人而喪失所賦誰之過歟天使為人
而自棄之孟子曰人之所以異於禽獸者幾希庶民去

之君子存之此自是已所當為何待人教乎曰亦有無理之人乎曰無是理則自不為人矣所謂得其偏者為物本乎天者親上本乎地者親下為飛為走者是矣然而虎狼有父子蜂蟻有君臣鴻鴈有長幼睢鳩有別鳥鳥知養豺獾知報本此其得一偏者猶不失也人得其全而乃失之又如何哉曰同是人也同有是理君子小人何自而分曰孟子言之矣從其大體為大人從其小體為小人大體心小體耳目口鼻形體血氣之屬也心

有五常四端是天所賦謂之天理口體之屬止有聲色
飲食男女是入所欲謂之人欲人若以天理心思為主
則為大人君子若但以人欲口體為主則為小人也曰
然則君子無欲耶曰君子以理制欲使皆合義小人則
專從人欲滅天理耳雖然先儒有言小人不合小了他
本不是惡若學以明理能制其欲即為君子蓋天地之
間只有陰與陽天理陽也人欲陰也使天下之人皆能
以天理勝人欲則自然事事合于天心自然陰陽和風

雨時百穀豐登萬生暢遂災害不生禍亂不作也曰為學之事非易豈天下之人皆能為之哉曰古昔盛時治而教之故當世之人皆自八歲入小學十五入大學無有不學者人人皆知有五常萬善凡人倫日用已所當為者盡力行之所以上之治教明下之風俗美而後世不可及也書曰平章百姓百姓昭明協和萬邦黎民於變時雍正謂此也曰古之教民之法可得聞歟曰古之居民二十五家同一閭巷巷首有門門邊有堂曰塾民

出入常受教於塾而後行之自八歲已入小學收放心
養德性既長又有兩塾之師教之行其理去其非故賢
者得以明理善俗愚者亦能寡過遠罪而不自知也今
縱不能然但鄉黨里巷中必有年老有道理者原注謂身行之
而有得於心或識道理者原注謂生質之美皆可師而問之知愛其
身不墮於惡窳則漸自長進過失漸少道理漸明是亦
古之遺意也蓋古之所行者治世教民之政今之所言
者使人人自明其理之法夫萬物之中人所以最貴者

只是為有此理若我心不求明之以充此人形安得為靈夫子謂仁豈遠乎我欲仁而仁便至只回過心便是又何難哉子不聞郭西劉氏之蒼頭乎逃于平陽數年矣值此變不死次日徑歸其主此即能回心而得理者凡今之人孰欲出於蒼頭之下乎曰然則祈禱謝過無益乎曰知其過而改以遷於善則可若不知其過或畏難而不改則是欺天侮神反招禍矣何益之有昔者夫子疾病子路請禱子曰丘之禱久矣蓋聖人未嘗有過無

善可遷其行素合於神明雖不禱猶禱也常人所行違背天理雖日禱之猶不禱也如已有子或婢僕事事違背於已而每每只來禱告是欺侮於已則愈增怒矣能無咎責乎昔樊遲問知子曰務民之義敬鬼神而遠之可謂知矣義是人所當為之理人只合專力為之若不明義理只知褻瀆鬼神可謂不知也已然此猶論當祀之鬼神爾若淫祀又所不論也記曰淫祀無福若遇正人則自當廢去矣夫豈能貪天之功而禍斯民耶故漢

谷永曰明于天地之性不可惑以神怪知萬物之情不可罔以非類人而可不知學哉曰廬而處禮乎曰禮若有疾風迅雷甚雨則必變雖夜必興衣服冠而坐所以敬天之怒也孟子謂知命者不立乎巖墻之下盡其道而死者正命也桎梏死者非正命也人事盡處方可言命今天地大變而人豈可偃然無所變其處哉須一切廢罷宴樂聲伎紛華利欲之事常以憂畏改悔處之則可詩云敬天之怒無敢戲豫敬天之渝無敢馳驅當如

是也曰聞之自古災異多云政令之闕失何也曰各盡其職分可也職分者各人分限中理之當為者也在位者固當自改其一官之政治闕失然而無位者不當自責其一身之失理乎昔者大舜為其父母所怒每往于田則呼天號泣曰我竭力耕田共為子職父母不我愛不知我有何罪怨已失愛自求已過不得於是戀慕而號泣故終能致父母和悅漢萬石君子孫有過失為便坐對案不食然後諸子相責因長老肉袒固謝罪改之

乃許凡父母若有怒為子孫者當相責而悔改況天地大變如此而人可不自求已過以改之乎夫人之一身儘多有事大學論絜矩則欲其上下四傍均齊方正若自五事四勿九思九容三戒三愆之屬以至父之慈子之孝兄愛弟敬夫和妻柔朋友相責以善泛愛親仁之類是皆天命之流行人事之當為者日夜切已點校若有不盡則竭力加勉此之謂自修故曰君子求諸已小人求諸人天下之人皆知自責以自修則皆得其理若

但責人則皆失其理矣不可不慎也所以先儒有責上責下而中自恕豈可盡職分之戒昔年僕買溫公家範于市有張姓者曰此部書不售二十年矣嗚呼此亦觀風俗之一端也若家範所言自祖及孫以至乳保各有言行為法此職分也曰然則當如之何曰夫子傳震之象曰洊雷震君子以恐懼修省當此震驚之際唯當畏天之威而自省察其身心過失急自修治而痛改之又推求向之過失之所由來而盡絕之或昧而不知者學

問以明之或既知而行有未至者力行以實之蓋人言行之失人猶得而尤之若夫心思幽隱之過惡人不得而知者惟自心與鬼神知之故曰為惡於明明者人得而誅之為惡於冥冥者鬼得而誅之可不懼乎曰如長平四十萬新安二十萬其中豈無為善之人耶但玉石俱焚亦古人之言也豈無其理哉曰奚止於是古固有此屋可封比屋可誅之言矣孟子謂富歲子弟多賴凶歲子弟多暴非天之降才爾殊也其所以陷溺其心者

然也夫人心陷溺習以成風雖舉一國之人皆熏染如
一生長見聞而不知其非不然何以詩有十五國風耶
夫子首以二南而終以豳者又豈無意哉其旨深矣故
善為國者必以正風俗為本也夫長平新安之人以為
無罪不可殺降者為白起項羽言之也若於趙於秦論
之則皆叛卒豈得為無罪哉若夫玉石俱焚之言以火
之無別發其下文曰天吏逸德則烈於猛火矣故分別
而言但殲其渠魁若脅從者則罔治之非若火也鬼神

聰明正直豈無知耶曰終疑有濫者曰思之痛心難盡
言也於此只當斷定以天道與聖賢之言為決可信決
不悞人且為善猶未獲福為惡更欲何望今遇此大變
異只合深自恐懼修省唯恐悔改不及而禍變大至豈
尚有疑惑工夫故曰吉人為善唯日不足也且為善而
安富尊榮為惡而誅死禍賊此天理之正也若或反之
則在君子為不幸小人為僥倖又先儒之言曰為善而
得禍是善未積為惡而有福是惡未稔子將奚擇焉人

果能自省察知其過惡將畏懼悔改之不暇何暇有疑
人生短景日日改過遷善未知畢竟能得全其天之所
賦與老而歸全否且孟子曰仁人心也義人路也舍其
路而弗由放其心而不知求哀哉又曰仁安宅也義正
路也曠安宅而弗居舍正路而弗由哀哉聖賢所哀為
其良心已死也蓋人與飛走不同處只為有此仁義禮
智之心謂之良心若無此心則韓子所謂其貌則人其
心則非者孫明復亦云人亦天地一物爾饑食渴飲無

休時若非道理充其腹何異鳥獸安鬚眉人至於此則
與物類何異可不哀哉嘗見故老教人曰換了你心肝
者此雖俚語實於人有益真起死之神丹也曰聞之天
地以生生為心而殺人如此何也曰自取之也天以陰
陽五行化生萬物流行不息故生意無窮惟人得其精
故最靈於物若善用其靈存心於義理則天之生意常
在己身若不善用其靈專役於利欲遂生出私意欺偽
百端皆與天道正相違背生生之理隔絕盡矣書云自

絕於天又曰非天夭民民中絕命又曰非天虐惟民自

速辜大

原注疑作左

傳曰妖由人興人無釁焉妖不自作人棄

常則妖興正謂此爾蓋天本只有生生正氣因人所為
邪惡悖戾積此惡氣薰蒸雜亂則亦有乖戾惡氣也亦
猶天地之氣不時則人病人之氣惡則病天地矣故人
為善則與生氣流通為惡則與惡氣相感猶水流濕火
就燥各從其類也如五福六極之類皆是也書曰天道
福善禍淫曰作善降之百祥作不善降之百殃曰惠迪

吉從逆凶惟影響豈欺我哉曰吾知所處矣生死修短一聽於天則此心虛靜有何憂懼曰此其粗者耳昔司馬牛問君子夫子曰君子不憂不懼曰不憂不懼斯謂之君子已乎曰內省不疚夫何憂何懼必日夜自察其思慮云為一一合理無曠人之職分則自然心廣體胖不知憂懼若有未盡善不合理者即是過惡安得不憂懼乎曰吾亦嘗自思所行亦無甚過惡只此平常用心亦可矣何必問學而為是紛紛也曰此猶所謂美芹子而

樂炙背者不知天下有美於食片樂於炙背者多矣人
見西子而後歸憎其貌不覩大公不見自私之為小智
不知禮義不覺物欲之害良心故先儒有言學者舍義
禮則飽食終日無所猷為所事不過衣食之間燕遊之
樂與下民一致夫人豈樂為下民哉溺於所習而不自
知耳夫子謂性相近習相遠又曰君子上達小人下達
蓋言習也古人有行年五十而知四十九年之非者人
若不知學不以禮義切已省察豈能自知非但見人之

不同已者為非爾此之謂失其本心但不知不覺作一世惡人而死耳曰觀鄉里中亦有溫恭不爭競是非者人皆稱善亦可矣曰此所謂資質美者更在學問以進之為聖為賢不可量也若只如此而已是夫子所謂鄉愿之人似有德而非者故曰惡莠恐其亂苗也惡紫恐其亂朱也惡鄭聲恐其亂樂也惡鄉愿恐其亂德也為其不知學問更不能進向上去只如此同流合汙闔然媚于世衆皆悅之自以為是以終其身而止于此有害

聖賢大學之道也然則聖人所惡亦非天之所祐者也
曰聞有言老而學者此亦無用之言也歟曰昔人言之
矣日暮豈不秉燭乎猶勝坐于闇室之中也曰將死矣
能一明何補曰夫子謂朝聞道夕死可矣雖有半日之
生猶當聞道期不負此生為人猶勝虛生虛死與草木
無異也曾子臨終以一簣不合禮必易之曰吾得正而
斃焉斯已矣豈以將死任其非理耶曰觀世之學者必
數十年而後有成吾旦暮人耳安得此光陰是可傷也

曰不必如此昔有李初平欲從濂溪先生學先生曰公老矣無日子但每日來聽說話於是二年後有所得此或一法也若未至於老則茅容四十餘方學終亦成德焉人莫不有神明用之當于其要往往於不緊要事搜訪須要得知及至已身一生為人一大事卻以為等閒傳所謂茲心不爽昏亂百度者可哀也哉曰自古地震多矣未有如子之說何也曰若有則不必說矣曰亦有與子說異者曰此所以言人必須學問也人不知學則

聞人之言是與非莫能辨往往只被邪說惑亂引去聞
正言則反疑矣夫子傳夫之九四曰聞言不信聰不明
也程子曰夫過而能改聞善而能用克己以從義唯剛
明者能之又曰剛然後能明柔則易遷失其正性豈復
有明也故聞言而不能信者蓋其聰聰之不明也書曰
視遠惟明聽德惟聰夫聞善言能信而無疑者聰明過
人者也在子思之如何曰事天有道乎曰有孟子曰存
其心養其性所以事天也詩云畏天之威于時保之人

能常常兢畏齊栗如對君父如事鬼神則心不流蕩放
去心既常存則能保守得天所賦之理完具不失順而
行之不敢夾雜一毫已意即事天之道也詩曰不識不
知順帝之則雖文王亦只如此餘則張子西銘詳之曰
雖然吾將有禱也子姑為之辭余口授之曰坤靈震盪
民物天傷昏昏冥多失於降衷致清寧有非於常理違
此大警敢不痛懲誓除既往之愆敬迓好生之德斯可
也曰今日之言多矣不能盡記子盍為我書之遂書草

廬中記荅人所問然難於命詞太俗則鄙俚為知德者
厭稍文則不學者惑畢竟無益雖病中時時改定終未
能自愜也或謂余曰子之意誠厚然吾思之亦甚愚也
夫人之生雖同得天之理以為性而亦有陰陽五行之
氣以為形質理性雖同而氣質有萬不同者故曰清者
智而濁者愚美者賢而惡者不肖今此愚且不肖者乃
有生之初既稟得濁惡之氣既生之後又無賢父兄良
師友教養之功又為風聲氣習之所驅染自襁褓無知

之時已為紛華物欲放僻邪侈蠱惑至于少壯耆艾矣而乃欲一時言語文字間使其自知照了悔而改之亦難乎又恐吾子重為人所怒也余曰子之言良是雖然古猶今也當聖賢之時豈無氣質不美之人豈不知氣習物欲之為害哉夫子曰有能一日用其力於仁矣乎我未見力不足者又曰仁遠乎哉我欲仁斯仁至矣孟子曰人皆可以為堯舜又曰中也養不中才也養不才故人不樂有賢父兄也如中也棄不中才也棄不才則

賢不肖之相去其間不能以寸周子曰人有不善則告之不善且勸曰庶幾有改乎斯為君子又曰聞人有不善則曰人孰無過豈知其不能改改則為君子不改為惡惡者天惡之彼豈無畏耶焉知其不能改故君子無不愛且敬焉朱子釋之曰告之以不善者恐其不知此事之為不善也勸之改者恐其不知不善之可改而為善也夫聖賢豈不知氣質物欲之為害已欲達而達人推已及人仁之方也明德新民大學之道豈有棄人於

惡耶其變化之蓋有道矣如百姓不親五品不遜帝舜則使契為司徒敬敷五教又使夔典樂教胄子以防其失夫子言生而知之者上也學而知之者次也困而學之又其次也困而不學民斯為下矣子思言人一能之已百之人十能之已千之果能此道矣雖愚必明雖柔必強藍田呂氏解曰君子所以學者為能變化氣質而已德勝氣質則愚者可進於明柔者可進於強不能勝之則雖有志於學亦愚不能明柔不能立而已矣夫以

不美之質求變而美非百倍其功不足以致之今以鹵莽滅裂之學或作或輟以變其不美之質及不能變則曰天質不美非學所能變是果於自棄其為不仁甚矣凡此聖賢大儒所以教人言雖異而旨則同而呂氏尤切故詳著之蓋氣質習染時尚物欲數者維變化氣質為難然既能真識德性之正自能覺其氣質之偏於日用動靜語默間事事力變之則是天理之正所謂非禮勿視聽言動一日克己復禮吾身過失皆可一舉盡掃

除矣譬如雲霧陰曠雖甚厚疾風烈日鼓蕩消鑠之豈
有天宇不能清霽者耶要在致知力行篤志無怠而已
至於為人所怒則非愚之所能苟免也雖然十室之邑
必有忠信如聖人者儻使見此說或能感動奮發而有
以變於前而善其後者焉則於國家化民成俗之美豈
無萬一之助耶

跋周文矩校書圖

右題曰周文矩校書圖案劉道醇宋名畫評文矩建康

句容人仕南唐李煜為待詔善車馬人物子女用意深
遠於繁富尤工與蒲師訓黃筌父子孫知微孟顯同列
並在妙品中圖凡八人皆唐衣冠三僮子前三人與胡
僧對坐朱衣者持梵夾讀僧屈指為數物狀衣綠者指
左黃衣者拱手皆有談說似是為文事者中二人偕立
童子磨墨一則憑曲松而言若口授其意一則據石左
執卷右秉筆而掌其頤若思隲括其意而將為書者後
二人坐石上共執卷一讀而指其文一仰而若有所思

者此卷藏故經歷李君長卿家有年矣今乃孫凝仲袖以示余欲究其實未暇也留已久遂歸之且備記之他日或有所考併書於此以詢諸博雅君子求其所謂深遠之意云皇慶癸丑涂月中泚蕭某書

祭雷孝述文

維至元二十八年某月朔日蕭某告于秀才雷生孝述之靈嗚呼我方抱中殤之悲而重聞孝述不起疾嗚呼何以爲情乎前月末見子羸頓雖若可憂者然猶謂子


年方少氣方生長或者雖困將不害乎且以經歷君淳德所庇伯靜兄餘慶所鍾孝述其將良已乎況孝述之慈良敏達可與進德天既生之必將有以成之寧遽止于此乎既而友子言子回則云日能食半碗許矣當是時我方健羨仲介兄弟視護之勤而痛恨我之為人父母而不能盡其道也二十五日之夕寬甫書來慰我其末乃報孝述之凶驚怛失聲哭諸寢門之外嗚呼寧遽真有是耶我之疎愚不知憂畏每如此耶抑冥冥之中

神化固莫測耶所謂裁者培之傾者覆之復何說耶豈
人事或不偶耶將孝述夙所受耶是則所謂命耶否耶
嗚呼世道多難同志凋落苗者不秀秀者不實悠悠蒼
天此何心哉嗚呼屬余具食吉月以拜左右之為殤女
來者不得往哭孝述之柩且慰汝尊長之哀負此存歿
既慚既痛知將葬子於後之四日期于此視汝入土以
為永別奠以告子庶亮我心尚饗

祭周介夫文

維延祐三年歲次丙辰十二月己巳朔四日壬申友人
某等謹以清酌柔毛之奠致祭于故從事周君介夫之
靈嗚呼介夫行人所不能行好世所不能好脫棄方亨
之仕罄竭因心之孝孔顏曾思之謨訓虞夏商周之典
誥趣味淵旨辭義雅奧諷詠若建瓴而琅琅窮格見天
心之浩浩貴義輕財有犯無校恤人以惠愛為常居官
以廉勤自效謂造化之弗僭汙康寧而耄耄何期一往
而弗還不見年高而德邵嗚呼民物憔悴人財彫耗如

斯吉士之無年何乃旻天之不弔觴豆雖陳莫論久要
從茲永別以終天能不長號而痛悼尚饗



欽定四庫全書

集部

勤齋集卷五

八

詳校官庶吉士臣龍廷槐

侍讀臣孫球覆勘

謄錄貢生臣吳士英

謄錄監生臣雷琳

欽定四庫全書

勤齋集卷五

元 蕭顥 撰

五言古詩

偶成

古鏡徹肝膽
嫫母難為顏
桂枝苦膠結
直士不可攀
小草有遠志
結根在深山
寄謝荷蓀翁
聊放斤斲閒

錢屯田府送涇陽趙天麒歸養

之子來關西
尊親留山東
眷戀豈不勞
五鼎志未充
幸

從兩賢游獲聆古人風內外別重輕學問道孝忠中宵
膝下夢明發歸興濃寄聲為徵言迺然發我容覲面或
不親千里風期同利欲劇膠漆孰能奮高蹤菽水可盡
歡况乃滄漚豐君子愛方寸勲業雲浮空任重欲道遠
期爾善初終

贈張竒童

聖學久不作美士幾空老藝文聲利間身心若為造
物或靳之寧馨焉用早神駒萬里氣整轡遵大道

送熙正妻兄宣撫順元

開歲屬凝沍幽潛未昭蘇念君夷徼行旅懷曷由舒雖
為君家甥情好實天屬傷哉異出處會遠別恒連負病
抵京闕方欣暫留連王事不可緩遑恤道路捐生離古
云悲而況今若此虛名來實患乃復先哲恥天家我何
補遠人予能懷適觀惠永寧順元與之偕過家語妻子
若箇青山深洪恩釋病翼終焉渺雲林

寄廉承旨

嗟余晚聞道寡昧莫與儔學農且無成而敢玷士流下
問脫有人披簡副所求何以佐司成將貽君子羞

劉君寶植檜

珠璣飾翠蓋季孟松柏間雨露長新枝斤斧困舊山傷
彼菁莪詩千載不復還君其保玉體育材濟時艱

題伯時馬圖

茂陵好奇才未幾輒殺之爰其御馬際乃得休屠兒社
稷屬四臣翕叔獨無疵多岐果喪真不若求天資

周謙夫職貢吐綬雞因為題賦以送

南山有珍禽向日吐奇彩紛紛衆色具煥爛羣目駭須臾復斂閔榮耀不常在如何組綬者屬意異真宰

蔡道者歸江陵

原注月間月湖之弟

道人索我詩不知將底用但云難會面明發適雲夢水月本自閒何乃爾倥偬相見只論心是可詩以送

小女

小女年十三風骨頗自清隨意作粧束便有林下情見

爺困垂頭佇立思屏營飄然過我去颯爾清風生

四月八日張閨甫林居燕集明日寄謝

芳節聿云邁之子有嘉招杜曲多勝跡茲焉謝紛囂前
山羅峻屏後山鬱宮堯迴潭蔭古木溪流瀉青瑤美樾
席長筵穆穆來清飈即此冲襟適而况豐酒散新荷動
游魚高柳初鳴蜩竹林有官守蛙吹無征徭坐久窮源
泉珠琲累累跳波神勿爾劇我豈夫婦蕭攀躋出林杪
頓覺人境超翩翩六七子亭亭各清標晤言雜善詭既

醉仍相邀生平丘壑姿忘機狎漁樵爭席猶未肯勉矣
鉏吾驕歸途念勤厚報以新詩誼

新嘉議壽八十

發袞覽貞辭驪然失衰疾藹藹慈祥氣馥馥芝蘭室聖
代孝治源先生醫國術考槃且莫歌尚父鷹揚日丕賢
昔有陳千古配祖乙願言告猷裕於以贊勤恤高蹤詎
長往蘭芽復秀出善醫與善計咸曰今鮮匹勉矣行所
聞南董方佇筆

四月一日小酌興慶池上畸亭翁命以江上被
花惱不徹分韻賦詩五言得惱字

朱明受謝初未厭青春好鶯聲何處來喚我東城道瑞
靄鬱嘉林光風汎瑤草逍遙池館清爛漫芳樽倒滄波
滌塵慮大地入幽討聯翩六七子南金照和寶宗匠斫
雲公健筆摘華藻雄辭擊包蒙溟漲吞潢潦思風吹言
泉無復為詩惱奇險破鬼幽突兀奪天造人生慳百歲
快意豈常保今者不盡歡誰與傾懷抱牛毛身外慮一

醉徑可掃君看秉燭詩莫促歸驄早

寄題任東卿訥庵

行繇言大難言以難為詡口給見屢憎維訥於仁近元
聖詎吾欺千古昭明訓慥慥任隱君勇退中流迅衡茅
扁訥庵身道相與殉作歌豈小補儼佞亦思奮相望邈
山川十載勞芳訊披雲杳無期因風致多問

孝顯堂

宗周孝友家千載慶未已孝顯克繼序詠歌已盈耳榮

親在騰芳蕙善貴成已尚口或貽羞庭訓亮及此會見
德星褒式表高陽里

孝安堂

美哉風化墟周南有遺化賢哉石氏母高節等嵩華發
居撫二稚誓言保桑柘夜績手拮据晝哭嗷為嗷力貧
資兒學食荼謂如蔗天運有窮通流光迫晨夜之子悉
能賢讀書事耕稼滑甘為母欲和柔以之藉兩婦饋堂
上九孫戲堂下熙熙一堂春無冬亦無夏戶冊即實錄

鹿泉豈褒借邨侯言孝養致敬安未暇乃今所皆能黨
里旣驚詫願言篤有終川流貴無舍

安庭實經歷損齋

靈臺湛晴空物欲劇奔驚損人以復天千聖同一趣主
一欲斯寡無我又奚怒進減及其盈三德又殊賦恭惟
魯叟嘆始覺向長固歆器戒持盈而何廢挹注寥寥向
千載莽莽榛此路奪攘饜已私覆溢昧侯度三肅齋中
人愛之莫可助

夏夜有懷畸亭翁

隣笛叫明月懷人割中腸
恍忽欲命駕猶期揖容光
丘山與華屋夢斷海生桑
臨風一浩歎辭短哀甚長

送甥翼漢史之行

歲晏冰雪稠路永山巖薜
奉檄子當行我懷愁觸撥
爾行見我姊母子笑喧聒
我今乃無母念之心若割
牧民如牧羊凡百慎筭喝
一朝或鋌走何以免鞭撻
況彼亡命徒尤爾費檢括
王家豈乏此僥倖庶可遏
汝往善為

之勿或致乖刺人生少合并真若弦與箏今者不盡言
惓惓何由達衣莫求鮮麗食莫厭疏糲失志毋刺促得
意毋軒豁百年憂樂半天運有旋斡人或昧此機患至
如俯掇斯言久當喻勿遽謂迂闊因風數寄聲慰此長
饑渴

送韓德剛赴鞏府辟

學已有淵源行已寡悔尤殊才不久屈同氣還相求高
步豈易量長吟方欲愁儒冠未策勲行當換兜鍪

題白逸民行齋

堂堂潁陽侯所尚存諸外干祿與問行夫子悉正對逸
民負逸氣行齋見圖繪何以忠告之願守書紳戒

寄石仲璋尚書

英英大司馬雲巾嘗拜辱及聞即明陟未克馳賀牘侯
公有嚴命烏敢遽往復因君致多謝鄭璞元非玉

臨流賦詩圖

負病觸隆曦殿尿伏嚴景空然蔑補報索米恒耿耿邈

矣乘化翁高蹈孰可並繪事一起予終曉不能靜

送公邁

冬溫苦為癘長幼無孑遺百憂攪中腸况聞子言離人生事如髮此別歸何時留贈華佗帖重感懷古思

聞古大學功一皆用其極必具聖賢質又盡平生力雖云莫我知或有不豫色遺澤被無窮豈在高官職

殷勤重來別是夕當元夜村鼓敗人思作詩良未暇怒馬心如擣孤燈耿書架猶多未見書子去何由借

送趙彥卿

新陽敷德澤萬物氣方吐
友生事行役觸撥別離苦
向也惠安政到今民歌舞
調官復何之懸知又南土
何當占一廛爰以得戎所

題方氏得雄卷

聞君亦齊產未面心已親
况脫貴驕累澹然守吾真
德人豈無後宛焉掌珠新
要當成大器之無奚足陳

送潘獻臣

冰雪滿天地人行背南鴻中臺有嘉招云胡太怱怱枉
駕索贈言常談若為功喧寂從茲異尊酒何人同

送王君道

周詩三百篇元聖垂世楷勸懲發真心炳炳無并猥云
何百代下隨意變蘊蔭澆醇而斲觚豈弟生塊磊溫柔
敦厚教於斯果安在千唱復萬和喧虺劇雷駭鼓舞行
橫驚徼倖死不悔其流生禍然夫豈詩之罪雍翁大雅
人談經今永罷哲嗣忽壯遊訪舊淚欲灑驅車向金臺

寧不弔郭隗頗聞古昔言禮義譬醢醢人有懷昏姻萬
事悉瓦解外內相重輕窮通奚足悔思後貴慎初愚言
智所采

送李之晦

疾風起中秋吹此長恨端友生別我行留詩感陳根吾
甥君姨弟實維得齋孫與子每偕來視友知子賢慨焉
念存沒倍益離別酸六卿職阜成其屬諒為難隴憲慎
所辟子宜富貴牽老親困三鼎清俸資餘泉神京桂玉

愁難發
廉士歎
願言保方寸
勿為橫流昏

送楊仁傑

與子相為甥
倏忽四十年
大化不停冶
稚齒成華顛
回首感存歿
相看兩淒然
我病卧衡門
君行戍極邊
一別一衰老人堪
幾離筵
此行亦良苦
冰雪滿山川
君恩會須報
金節煌煌懸
我非贈言者
情話當一宣
羌渾風沙地
尚慎食與眠
世途足機穽
人心有戈鋌
象有齒而焚
膏以明
自煎忘言意
愈適不飲體
自便
孫武善言兵
仁

義行機權為學無早晏力行以為先刮目看豹變何時
復言旋

送馬季卿

之子征車發首路麗山陰政爾盍簪樂坐使增悲吟嚴
君阻定省東南控喉襟縹緲望白雲孺慕不自任游子
半月程慈闈萬里心長亭一卮酒此意江海深新涼燈
火盟何當重來尋

雪城錢氏畫折枝梨花

大谷有嘉種，飮坐冠榛栗。芳甘滌煩毒，養賢代鼎食。陰
精蓄造化，一發移歲律。絳帙麗朝霞，香雲藹晴雪。畫史
誰折贈，繁枝寫生質。云何以春華，而乃廢秋實。衰疾固
多感，撫卷三歎息。

墨竹

物態有枯苑，桃李隨春殘。此君異其稟，抱節老歲寒。風
雪霜露雨，榮悴亦變遷。復不如墨君，長年鬱盤盤。天地
會有壞，矧伊寧獨完。但能存此詩，此竹無窮年。

贈鏡機子

壽卿明敏資丹青聊適意蠟屐與揮鋌未覺累高致妙處固有在形似抑其次君看造化筆衮衮生萬彙擇術古所慎藝成當撥置螢窓積舊書家世要卿記

送石郎中

原注仲溫以公事之京師人謂其有長往之意故以拙惡釋之

杪春渴時雨沈憂萃中襟新知復言別作惡那能任世故巧相違滔滔古猶今行止貴時中清和非所欽二頃詎可無倦翼知舊林西周厥田美溪山極清深他日此

優游胡然有遐心

寄上薛郎中

正之

長安有賤子，捐介仍木訥。倔彊背時利，曾不厭糟粃。為
學少師承，窮年恒矻矻。平生子陳子，蓬心資剪伐。時亦
接杯酒，清晤坐深樾。每日言薛公，於余比蜚蜚。氣岸與
我同，言議更英發。法當正王度，玉立侍金闕。於今卧衡
門，仰空書咄咄。間以筆墨戲，風雷入撞捩。高出溟滓上，
幽入造化窟。岐陽匪螭螭，大鯨偃溟渤。爾能掃其門，金

丹換凡骨塵緣上繳繞歲月坐飄忽畸亭已飛仙自分
黃埃沒今晨辱嚴命一聽凜毛髮雲霧不易披川壑阻
超越三薰裁短章式代下風謁他時不棄擲庶得補黥
刑

趙左丞出示其先相君挽歌詞命追賦

忽忽經天日滔滔逝川水哀哀蓼莪痛愴愴霜露始世
故安可窮危機諒難履蕭蕭白楊路千古同一軌雖則
古所同天性曷能已云何慰永慕令德播清美

聯句

雪夜聯句

王城何喧闐人事苦紛糾

飛卿

登高期五載屢歎失重九

軒及茲今日游乃陪諸君後

文振

山雲釀層陰急雪暗林

藪

士光

龍公詫奇巧六出碎瓊玖

從善

何人醉擁貂有客行

印拇

軒

豐穰真有兆潤澤到南畝

士光

糗糊增丘陵浩蕩

匿瑕珞

從善

狂笑山陰興清讓灞陵叟

士光

小集慰情親危

登怯衰朽

飛卿

古洞春意融高岸雲氣厚

文振

短日阻奇觀

長檠破深黝

料

留連蘭友情激灩瑤觴酒

振

爐烟輪囷

上梅馥斷續有

士

密竹聽繁聲前山應白首

振

寒烏已

定棲饑虎時一吼

料

初謀一日歡定作再夕久

從

歌杜

感伶俜維駒舒懷受獻酬忘賓主辨析慎然否

料

名

談亦間發疑義得詳扣

從

善既趨正大途肯使聲利誘

料

齋心樂一簞折腰鄙五斗

士

固非長夜荒庶免具眼醜

振文餘波及聯句思苦心欲嘔

從

善安得言湧泉但覺箝在

口望月將轉申聽雞已過丑今夕喜盍簪明朝惜分手

何當追雅集村村有花柳

並料

七言古詩

立春後五日中夜始雪抵曉無寐擬歐公在潁

詩律奉寄從善文振寬甫舜舉諸友好且約同

賦

夢覺初聞捲窗紙拊几止之疑鼠子斯須復作已驚心
開門見雪可勝喜鴻濛天地還一氣浩蕩洗空方未已
墻隅先集已成堆平地半融應及指回風灑面不鳴樹

落日甘寒忽無滓冷然內熱頓蘇醒兩髀相圍還擁被
冥搜未就興氤氲時一窺牖恐中止今年夏旱失西成
不雪來楚復何恃况茲羊馬暴終冬官縱不訶天聽邇
豐年作兆尚來茲癘氣且先銷眼底人生苟活即多幸
敢歎後時傷已死終然墮牀成一笑敢議昔賢折屐齒
天王所樂在得賢賢相樂在萬物理但得康寧免凍餒
野夫之樂無加此

昨承從善文振寬甫同賦雪詩復次韻奉謝

新詩百讀毛生紙奇特今誰若三子文章有神來有兆
怪底頻占烏鵲喜鏗鉤金石隱四壁幾欲賡載還復已
可憐操斧對般倅愧汗淋漓仍血指憶昨冬溫惱貧病
藥裏屢空煎及滓浩然一雪惠無邊吾與萬生均所被
熱中為祟得少間笑傲歌謠遂無止那知已霽變恒燠
面腫頭瘍復誰恃姚君神交若同氣室雖遠予人則邇
珍丸絡繹走急難起余長幼黃壚底人言昏宦情欲始
兩者幸無灰已死生子但如田舍兒自可噉噉沒吾齒

春光爛漫百鳥語我獨愁思紛不理伸眉一笑豈徒然
微詩之力不及此

送蘇德威經歷

君不見丹山之鳥曰鳳皇九苞奇質聲鏘鏘平生夢想
不可見飛來四海生輝光蘇君之德五色章簿領棲遲
聊晦藏胷中一塌羲皇地寒暑迭代無炎涼傲裝北首
烏延道舉酒酌君君盡觴明日相望天一方梁山萬疊
青茫茫

勉都幹權君并序

都幹權君明醫相之術相與浮江淮握手逾
月言論豪放世罕識之者亦隱於技耳賦詩
以勉之

長安城中豪俊林錦韉玉勒駸駸入門朱粉誇妙麗
出門青紫爭浮沉東家問醫西問相君獨燕坐釣其深
永眸一晚窮達判刀劑不許寒暑侵長安城外天陰陰
行人駐馬為悲吟高墳崔嵬葬白骨安得不死腰黃金

世間萬事何足恃禍福倚伏常相尋渠儂自愚君自巧
誰肯一笑忘華簪蜀人賣卜嚴君平垂簾閑肆窮古今
逢人但說忠與孝自有達者能知音察形察色君所解
直須洞燭賢愚心屈伸壽夭亦命爾公平正直神所欽

送姚伯玉赴闕

皇穹大德唯生生民中絕命百厲并聖神教之若其恒
多寡裒益一於平維古禪化今自營王文絕出天與能
六籍羣方粲日星一以御萬成有經旁蒐品物入擣烹

廓推氛翳通真靈芳馨籍籍騰紫清雲駕渺渺翩上征
視色祝由君自精舍梁肉其將何憑以身喻國廢易聆
安得憂其所可矜去矣壽域開八紘

送焦君美從單帥撫西南夷

天書夜下雷風馳大賢暫屈安坤維坤維小域羅羅斯
從古以降羈縻之倔强則討懷則綏往將膏澤摩瘡痍
懸知老稚相扶攜跪陳牛酒語嗚咿天王提封西南陲
孰敢妄意論雄雌曩時波斯利吾貲發摘邊釁生瑕疵

貨自地出何惜為但恐孫子成係累黔驢一鳴計已卑
堂堂何足勞王師自甘霜電摧枯萎豈意腐朽含華滋
呼舞拜荷天子慈從此鼓腹春熙熙英髦衮衮隨旌麾
盡道焦子尤環奇事君行已君自知臨歧把臂夫何辭
贈之以棗副以龜雙親素髮蕭蕭垂可堪魂夢飛天涯

寄子誠從善

早饑荐作興民謠流離孰得安其家癡頑堅卧對丘壟
宴坐况復書盈車食無精粗皆天物能致不死皆可誇

玉盤珍羞錯海陸生類有極饒無涯細糠火餅入健啖
嚼成快馬行深沙美如冠玉未屬厭乃今放飯寧非奢
雨餘春韭脆無滓闌干苜蓿烹柔嘉大庭遺經可久食
聖神德澤何其遐既不能為鳥來儀聖明世又不能為
獸屹爾撞懷邪素餐草木且深媿敢論索米遊京華

寄飛卿

枉山枉水昔未到乃今思之如故園德人在彼忽經歲
神馬想亦終南奔一尉東南二千里蹒跚勃率何如耳

每同陶鄭對壺觴
矯首長歌沅有芷
蹇予蹤跡更堪論
碎却田家老瓦盆
三雛索莫陪枯衲
藥畏猶然不離身
天生我材既樗散
壽夭榮枯何足筭
安得奮飛在君傍
一笑夜語雞聲斷

紀夢

夢中父疾自漱裳
呼母不見僮強梁
走歸感畏趨侍傍
覆面起席驅蠅忙
扶父藉褥蠅愈夥
拂之不飛身下多
承命掃將飼羣豕
遽然空有淚滂沱

壽某母

華年秉義不樹護耄期雍容蘭五蕃人皆歆羨五福備
那究一德通乾坤誰思彤管與細論凜然可使薄俗敦
君不見闕睢化行出麟趾義生禮作今其始

康樂堂為韓氏題

天家為羅亦為媒大開明堂致羣才小臣踈鄙胡為哉
海角松楸杳何許霜露明棗薦無所方寸晨昏割酸楚
百憂耿耿新詩披羨君康樂勤夢思增余卒歲風枝悲

寄答王真卿贈草書歌并棕竹杖

多君兩蜀獨鷹揚詩印高提四十霜應住浣花濯錦傍
飲芳食菲錦為腸天風飛墮雲錦章字字奪目騰光芒
中有龍蛟夭矯長宛如樂譜含宮商野夫不覺喜欲狂
快字凌紙雲烟翔一笑大勝濡首張劒舞何待公孫娘
奈何筆墨成膏肓

為韓氏題壽康堂

韓母吾知有陰德神理昭然斯可質不爾康彊富貴身

誰能三萬三千日公侯衮衮更何如
畫錦寧馨奉起居
羣表兩分金虎節東床更隱猶銀魚
直使黃金高北斗
欲似君家還得否
孫曾嬌笑滿階庭
母子熙熙俱白首
烹龍為炙玉為漿
銀屏繡几凝清香
緩舞安歌千萬壽
一堂和氣何慈祥
天下此歡真第一天
長地久那終極
多君致樂能及時
人間何限枯魚悲

陳受之舟虛亭

洛人陳天祿受之與物無競恒熙怡
其中洞然信靡疑

逆旅代耕聊逶迤一廛秦東亭北陸有屋深長如穹龜
左右花竹環窻扉延我侯生同宴嬉扁以舟虛僉曰宜
韓侯因為求箴規維木中虛可乘危載以百物窮天涯
維人中虛可從師學焉真與賢哲期雖有好者乏所資
若子政合勤於斯竭來徵文題以辭往取作者相嘲嗤
謝李居仁仲堅昆季贈象管

君不見漢晉已降文物亨麟角象齒封管城君不見六
朝湘東平巨盜特以黃中表忠孝黼藻皇猷推有唐雲

章煥發惟文皇名家奕葉驚海外解驅犀象惟歐陽自
茲千載神物藏後來繼之有元章我生苦後用葦竹坐
思象管成膏肓仙李墳麓辭俱美子文為贈紋如綺端
圓瑩滑尺許爾便覺千鈞入吾指變化縱橫若有神方
圓回合皆天真世論輕便傳逸少千載恍惚空疑人人
生尤物翻成累聖哲丁寧憂喪志阿堅何日復歸來據
德依仁共從事

子明劉弟奉使南行兼促乃兄歸裝

新正肇淑氣芳氣殊苑結星郎佩明教候禳走江浙寶
奩香一瓣懇為蒼生熱力疾賦民勞長歌為子別聞佛
有神力慈愛尤所切可能擴為良於焉息喋血可能土
為金於焉息饕餮癡者可能慧志者可能悅可能貞不
淫可能政無誦國祚永無疆斯民皆耄耄神功政可運
夢卜勞瘁哲茲任諒非輕行矣致裡潔戒飭况有命勉
哉無玷缺秋風蕭颯動江皋念子鴻雁歸飛勞團圞閉
戶學舖糟儻來富貴真鴻毛

欽定四庫全書

勤齋集卷六

元 蕭軒 撰

五言律詩

送濁玉甫赴番陽鎮軍府幕

濁子江南至劉生墓已苔十書九不到再去幾時迴幕
府傾高議安輿恃老萊經過釣臺下為我一揮杯

繼韻憫雨

為農仍惡歲何以豁襟顏狠暑工為虐驕雲不出山裡

霄那有聽造化頓疑間三歎瞻雲漢吾生爾太艱

繼韻謝張庸齋康使見過

野人朝食罷把卷負晴暉傳報行春客經過問草衣惜
無樽酒具空作簡書歸向別留佳藻光生白竹扉

送人歸漢中

客來破岑寂衣緇馬玄黃已矣貢公喜歸哉冰氏鄉慎
初原有道善後豈無方巷有怡然叟相從樂最長

和人見寄

屏跡惟藏拙，全生敢近名。來詩多溢美，內省祇深驚。畫
虎空貽笑，癡蟬枉自清。巴人酬郢曲，留滯不能成。

次韻答劉汝弼見寄之什。時汝弼客德慶侯第，
春事今餘幾。花枝已不多，向人愁作客。思爾積成病，威
鳳翔高漢。慈烏戀舊窠，平津東閣好。早晚定相過。

彭彥寬之藍田簿

佐邑鄰封好，時能見老親。宦清無暴客，俗樸少爭人。花
塢魚羹美，山瓢玉液新。雲霄當自愛，臺選在臨民。

寄僕散公

海角睽良覲年年擊石光離憂恒耿耿清渭日湯湯靜
想研羲畫閒應集藥方培風看鴻鵠漢刻願模將

哀李忠宣公

清獻丹心苦伏波老氣邁遐陬爭嚮義夜經忽移舟高
詠詞華盛尊名禮數優九原應不憾玉樹藹西州

送趙彥卿由貢北上

水擊看鵬運賓興感鹿鳴銛釗防覆敗河隴著廉平落

落松筠操依依骨肉情杜鵑啼正切惜別淚交橫

挽醫教武君

煜若家聲遠溫然德義充不因三折困妙得十全功思
綽重重渥明珠樹樹同已聞歌薤露猶及扇芳風

挽崔公度教授詩

驚絕崔夫子乾坤有若人嚴霜何粟烈老栢獨輪囷方
輟玄文筆俄飛絳帳塵九原如可作猶擬問迷津

七言律詩

寄太原僕散使君

聞說并州喜欲狂
思君不見欲飛揚
千年怪事程生馬
半夜孤啼狽失狼
玉潤珠明雖暫隔
龍跳虎卧遽難忘
公餘遙想多珍翰
汾水西來鴈有行

讀李卿諸君詩用叔經君侯佳製韻

羨君取足不求餘
神宇安閒疾自除
道可濟時何必去
利如生怨祇宜踈
水能隨遇知行止
雲自無心計疾徐
人處乾坤最靈貴
一皆實跡豈空虛

二十四日得句

四月已降何多蠅驅去復來捷如鷹撲綠眉目無可奈
浮沈粥藥還相仍族繁黨夥困病客寧神靜慮無由能
安得霜風一快掃九原孰已呼不應

送廉公邁覲省之燕

愛子初齡靜以方盍簪未幾忽離觴從兄覲母何多喜
附翼攀鱗未可忙輦轂芳華當擺落箕裘事業要張皇
直須言行無交病他日高明豈易量

送張晦甫代其父之吏部

冰霜栗烈去何辭，大軸無非幹蠱詩。
循吏徵科元自拙，春官衡鏡豈容私。
共推學力紬金匱，合有嘉猷禪玉墀。
儻為西川問民瘼，發棠端擬救饑羸。

原注時方艱食

九月十七日益都歸

精衛猶償萬古冤，為人寧不痛傷根。
危時莫得考終命，清世未能歸九原。
踽踽孫曾徒飲泣，張張凡庶竟何論。
此生苟獲存餘喘，九死終當叫帝閭。

送杜熙正

詔蠲逋負選名流
鉤考精詳孰與儔
方出錦城秋向杪
及歸蘭省歲還周
中年政苦親知別
長路况當冰雪稠
後會悠悠定何許
欲隨兒女挽衣留

簡飛卿從善

重陽曾約上崢嶸
遐覽宜搜酒一盛
未必陰晴為我地
已瞻水玉照人明
幾回見客詢山徑
半夜呼兒問雨聲
滿眼黃花開欲遍
東籬采采獨含情

次飛卿兄韻

白雪辭高屬和難，真成逐寸挽黃間。
百憂耿耿人空老，萬事悠悠春又還。
多病只知親藥物，一尊安得共雲山。
程書勤劇如秦法，枉却時人說愛閒。

寄答李昌道次韻

寂寂林居寡所親，若為姓字徹東秦。
百年已矣付牛口，一日乃爾登龍津。
善重瓊瑤非可報，名浮慄愧覺常新。
君侯汎愛誠多可，未必雲山許濫巾。

寄答王真卿贈椶竹杖

椶竹為杖尺度足稱我白頭多病時
斬根削皮真紫玉以心語口疑桃枝
行吟行樂殊生力看月看雲適挂願
安得化龍騎便去蜀中聞說故多奇

椶竹杖

不學湘筠染恨深海椶化竹世難尋
幸逃割剥小人手還喜棲遲君子林
蛇跼龍髯餘故質鐵肝石膽變虛心
風塵瀕洞多豺虎何止相扶伴醉吟

送程飛卿之武陵尉

落落平生鐵石腸一官聊復為貧忙
抱關無曠心常慙忍渴徐趨味更長
便買春洲栽橘樹終期夜雨對黎床
浮雲變滅君應識宇宙無窮日月光

莫嘆中年始入流也勝苦雨賦牢愁
非關之子謀身拙不解兒曹繞指柔
定有熊羆驚吉夢可無鞞鼓禦幽憂
他時去作桃源主南道憑君百不求

病瘳自警

我生憂患苦相仍欲話茫然數不勝羸臂八年三見折
危魂一夕九為升體胖心廣嗟何及族夫子賢那有徵
一事從今須十慮吹簫當為熱羹懲

寄熙正

市橋官柳又搖金風物應撩久客吟杜宇一春啼更苦
文君千載恨猶深風雲入手心雖切兒女迎門望不禁
總道吾廬勝錦里當時李杜果何心

劉叔經宣慰分遺蜀柑太夫人所寄

黃金三寸昔嘗聞
緹騎雙持意萬鈞
十月繁霜增璀璨
九秋清露飽輪囷
韻生齒頰餘醒失
香溢肝脾琢句新
嗟我永無懷橘樂
感君嘉貺一酸辛

餞止軒大隱

細讀滄浪竹裏吟
古人糟粕見君心
璿璣豈是池隍物
麟鳳難為苑囿禽
顙顙薜薇全大節
飄零詩酒豁英襟
世人不解聞韶意
爭向區區肉味尋

半生山斗夢魂飛
一旦青天宿霧披
健筆長驅無俗駕

高談英發不凡姿
離情慘澹從茲夕
後會微茫定幾時
且挽征車判一醉
西風搖蕩菊花期

送白天民以貢北上

九萬風鵬海運初
愛君苦恨盍簪踈
翩翩庾信縱橫筆
袞袞春秋內外書
騷衷騰驤千里近
鷓鴣棲息一枝餘
祇愁富貴還相迫
不及精良載道車

欽定四庫全書

卷六

欽定四庫全書

勤齋集卷七

元 蕭軒 撰

五言絕句

陶淵明

陶翁千載人頗為清淡累請聽絃上聲何害琴中意

節婦

匹婦固其守竹素千古華長樂癡老人榮耀何足誇

感事

曉窓方撮蚤么蟲何來集冤死復誰辜吾黨慎出入

菊花

學陶本無心中庭數叢菊行止有時義吾豈同草木

桃溪泛舟

清谿泛落花不受纖塵浣漾舟得新詩孤唱誰與和

西臯晚眺

倚杖立江臯放神超八極不覺歸鳥盡萬象入暝色

溪亭午憩

亭上曲肱叟有道出皇墳舒可彌六合斂之不盈分

葵堤晚步

葵生被橫堤花時日來往應恐秋節至零落同草莽

柳塘垂釣

游魚戲柳陰洋洋足生意綸竿豈不仁自是渠貪餌

紙扇

南薰時未至先生豈無功用舍非關已何傷篋笥中

送蔡道者歸江陵

五湖吞天寬碧澗日千里印月無二影到海同一水

過甘墅

有扈侮五行夏王致天罰豈知千載後幻水三綱沒

雜詩

春工無適莫是處碧芊綿底事沙如雪祇供鷗鷺眠
敗絮蟲無數晴窓蠅有聲垂蛛緣底事應報薺苗生

病中

熱病病欲死一窓風雨聲人生何比數天地有生成

四勿齋

動止悉吾心端淫皆此目為君舉一隅更取箕範讀

送王君冕

觀徹萬化原學之本斯識嵩高與烝民罔匪先論德
清水出芙蓉不受纖塵點定能完璧歸四勿恒自檢
功成名乃遂禹稷顏孟同彼哉日求仕何名復何功

送同周道

甥當省外祖意善體慈親徑欲傳家學終身學聖人

踰梁下幽谷登天復入淵山深疑欲雨水澹欲生煙
桑蕾蟾晴出天光卯色明芳時良友去一寸百憂生
兒時拜程翁今猶記其處無計得隨君有夢隨君去
匡時忌太孤學古不妨僻它日魏陽元成此外家宅
林深嘯夔魑月黑號兕虎念我行邁人道途亦良苦
拋却惠文冠幽居屏塵迹君去少來人老苔堆徑碧
齊民不逮中或者傷於過望望山中人臨風歌楚些
運斤雖入神良質竟無人送子且何言春風燕麥新

歸路驂騑喜香風入四蹄直須預相報遠近驛亭西

秋江送客圖

交臂語未盡風帆可奈何天長目力短離恨滿滄波

六言絕句

村樂圖

原注唐人巾服醉騎
牛歸童子牽而食物

畫史筆端有口物情大抵深窺詩翁醉即成寐孺子不
知飽時

虎溪圖

兩說充盈宇宙義堯反屬澆訛向問金衣公子在傍熟
視如何

楚江清曉圖

沙市人家未起何從得此江天定與阿章瓜葛筆頭爾
許風煙

長卿老友命題壽母詩

撫卷仰君壽母風枝動我悲吟報得鋪糜深意勉哉焜

耀來今

原注古樂府他家但願富貴賤妾與君
共鋪糜上用滄浪天故下爲黃口小兒

玲瓏石

日月騰光六合千巖細大皆通聞道主人方寸政如此
石玲瓏

省齋

大賢所言三耳吾輩當省幾何去之急如去疾終身弗
靈尚多

那得絕踏脫繫彼哉養疾徇生爲問深思清夜幾人熟
睡天明

日損齋

克己必從難者期於淨盡無餘茲乃聖門實學先須時習工夫

往聖繼天立極維茲禮樂政刑割袞縱裨邪幅終然有杵無星

遠嶼歸樵圖

目極空山野水魂消落日長途爾許荒閒寂寞可堪都屬樵夫

雪霽早行圖

狼暑薰心屬耳何繇夢此清涼且袖師文妙旨留看雪
月交光

孫大方家山歸夢圖

覺夢天然符契多君靈府能虛山木方萌寸蘗牛羊政
要驅除

聞山鳥

知是何年子母至今猶爾餘哀我亦何心聽汝有兒亦

未歸來

送趙彥卿宰惠安

龍節日陪淑問不爲培克謀身此去衆人應道定能字
我疲民

仕優所貴能學公退莫負寒釭祇應有長安夢時一到
洛陽江

海道爰周九寓南金應凜四知若見臥龍耕者爲言出
仕明時

題清白圖

三年憲幕長安咸讓順卿清白爰託斯圖示戒子孫永
寶無數

簡子清白著稱敬容賄而敗業誠知嗣守之難罔曰矢
詩稠疊

南巷琴阮圖

誰謂南巷老子遺懷猶有桐孫試舉淵明故事主人一
笑忘言

常笑仲容創物只如渠輩清談政爾雲門雅奏阿童且
抱歸庵

里社虎狼吞噬公私星火鞭笞得似庵中麋鹿終朝太
古熙熙

欽定四庫全書

勤齋集卷八

元 蕭軒 撰

七言絕句

郊行雜咏

雨洗終南湧翠螺
霽光搖蕩麥翻波
行行合得新詩句
傳入西家牧豎歌

薺麥油油露葉光
矮籬風軟菜花香
誰家翁媪迎門笑
言語無多意甚長

禾穗年前一尺盈，舉家翹首望西成。
南山晚禾無十日，都向秋霖作耳生。

長波渺渺麥藏鴉，宛若鳬鷺沒浪花。
行客不知農父樂，凝然立耨土如沙。

桑弧偏稱牧兒操，蒿箭盈腰犢鼻牢。
不關近來吹笛好，且看仰射阿誰高。

懸厓古栢倒生根，過嶺雲陰走燒痕。
知是一鞭農事急，谷聲傳響到前村。

廟門土鬼面如蛟斜曳樛枝一手高極力握蛇猶未得更誇千里見秋毫

隔籬笑語自嬌柔雞犬閑閑綠樹稠怪底桐花搖落甚

一叢兒子戲千秋

原注秋千本名千秋見黃山谷詩

乳下豚兒作隊嬉行人為汝亦怡怡莊生政自知魚樂

但爾難言與惠施

原注賈思勰云供食乳下者佳

益都長谷道中

西山嵐重迫秋深霜風拂晨那可任維良瓠壺行簡酒

此意何啻千黃金

旭日初升嵐未收西嶺絢爛東巖幽山靈不必歎遭遇
向晚大有詩家流

乾坤富貴是深秋客子都忘道路愁步障兩山開蜀錦
晴空一幕展青油

可齋爲張東甫賦

治生往往迷知足適可爲心信善圖祇有治心初不爾
直須聖處著工夫

五月十七日作

片段殘雲魚尾頰夕陽特向竹間明
嗷嗷盡歎甘霖少
得似尋常愛晚晴

席待舉述先訓

一自公勤得本真
饑餐渴飲任天鈞
披裘擁絮關何事
八表神游自有人

題張華甫經歷古象笏

孝養由來百福鍾
休徵相報古今同
貂冠莫作千錢計

指日文通拜侍中

即事

地卑冬燠耐凋零忘却長楊作雨聲
失喜夢回欹枕聽呼童起視月三更

積雨琅琅起百憂老來方識子孫愁
篋中舊筆關何事脫帽相看也白頭

題衛輝驛舍

月華如畫蝙蝠飛槐陰滿地空堦靜
蕭條床第困河魚

誰收病骨官途永

題姜君美菊軒

子幼雄深太史公
姜君雅淡斗南翁
不然千丈京塵底
誰暇開軒對菊叢

友雲軒

親友過從不易哉
稍加疏數即生猜
寧當只與雲為友
彼此無心恣往來

題路舜卿聽雪軒

五音端解使人聾聽雪雖清亦闕聰還有無聲真樂在
四時無日不融融

四軒修竹玉無塵聽雪寒宵發興新無雪不成尋雪聽
聽風聽雨總宜人

田舍壚頭睡美時雪花如手幾曾知竹窓明發傳新語
壓倒春蟲亂撲詩

讀是非箴

客伎何嘗怨飄瓦身寒只合襲重裘諄諄自反垂明訓

君子終身固有憂

九日東臯亭

山光蔥蒨玉無瑕
遠水熒煌帶暮霞
便是淵明舒嘯地
也容閒客醉黃花

粹翁語別詩以言贈

詩成點檢生驕氣
食飽游行有惰容
座右自箴今贈子
儒先曾戒晉人風

夜雨

杪秋暮雨不能晴簷下玉簪多葉生
滴滴通宵成底事
不聞鼠輩鬧縱橫

窓前花盛開

窓前草木開來久今日才看十一花
此去定應成末減
盛衰若此亦堪嗟

讀劉宣慰春日雜詩

十首新詩義幾般大都細說在家歡
常年豈為無花柳
莫是心閒較好看

重八日入城復禮文振季正畱飲過申得別次
韋曲已暮

愁陰初霽月初弦滿意秋風灑靜便午醉畱連情爛漫
曉來行役寂寥邊

應召早行過盤豆

熙熙穰穰利名窟踴踴涼涼仁義途自笑區區何爲者
趁涼日日五更初

隱隱林廬古道傍人云此店半闌鄉家家雞犬睡方熟

我乃忽忽趁曉涼

高持正山水卷

原注中山吳巨濟筆也

六合雲同雪欲飛一襟清興浩然歸還山此後休輕出
徒有紛紛捷徑譏

題蘇君政山水卷

倦游客子思洗腆樂山妙筆通真靈秋風一夕故山夢
明發馬首秦東亭

劉宣慰背瘡後爲壽

古來五福數康寧甚喜聞君藥已停病裏移心應得法定從好德享修齡

或以待詔見呼者

僻性難裁苦厭喧故攜書冊讀荒村鉛黃本擬分魚魯我自無心金馬門

同字韻和飛卿兄

如君古拙未多逢點檢賓朋只我同不向商巖尋四皓定應崩迫一生中

張希賢別業

李鷹小築便幽奇乘興而來足自怡兄弟交游半天下
祇應無壁寫新詩

奉答伯克

子母錢多負友朋夙宵慚恨苦相仍從知詩債慙尤小
庶望寬慈與免徵

皇穹命我爲人者斲喪於今僅幾存况此雲山公共物
敢容小智著籬藩

即事

疊嶂葱龍橫爽氣
嬌鶯圓滑弄清音
道人著閒聲色
底事寧須却入心

雪江歸棹

高人興盡有餘清
舟子凌兢噤不鳴
想得到家過夜半

一樽濁酒肯同傾

原注嘆同憂
不能同樂者

題何仲器靜安堂

童稚相看到白頭
知君無我最為尤
衡門晝掩南窓坐

除却題詩百不求

潁川貞女

弱女娟娟未有行
室家不足竟忘生
三生傳此豈徒爾
士子首途當作程

男子才良女子貞
天經地義聖賢明
三山作傳寧無意
要使人人此道行

有感

壞牆鬪鼠氣如牛
熏灌停機自作讐
食我困倉不嗔汝

壞人圖籍最堪憂

鳳麟未省知生處
蟻蝨何嘗見死時
造物相違每如此
區區人力果何施

以枕椰杖爲子誠壽

多節烏頭勝裏金
文章可玩力堪任
不如往作吾兄壽
免動炎荒食麵心

原注是歲艱食

瑞麥

休因瑞麥鬪詩工
指有枝駢理亦同
聖代災祥都不論

只憑人瑞作年豐

講畫寢章因以自警

古以晏安方酖毒
痛懲陰濁易施行
果憑雷烈風飛勇
赤日中天萬國明

有懷寬甫

翠竹黃花過小園
碧山江樹正當門
虛庭鏡靜苔花滿
唯欠幽人屐齒痕

劉參政生日避於蒙溪

春來多雨困衰疾河魚蹇膝相因仍無由往為君侯祝
五福應隨德日增

纔過清明霽景遲壽星光彩照蒙溪誰能得似君難老
直見仙人跨紫霓

求鹿脯寄李侯

鷄豬魚鴨苦生風牛禁方嚴羊熱中也為病妻求鹿脯
要知豈願學顏公

劉蕢祠

斷刻縱橫古木陰趨庭再拜涕霑襟後王肯鑒前車覆
猶慰千年九死心

別後

休隨事勢嘆滄淪明理元來即要津我自有頭回轉得
不應索異待他人

讀莊子

含哺而游鼓腹熙斯言本只說無爲豈知引起無窮欲
直到肉林并酒池

壽宜堂

北堂壽母君能養
孫子室家無不宜
一探本原為善頌
奈何人笑合題詩

送李經歷赴江東憲司

長安憲幙忽三年
沈靜詳明萬口傳
好去宣城攄素蘊
又逢同氣又資遷

東風花柳正清明
忍見慈親送子行
烟水迢迢二千里
望雲回首不勝情

金剛經卷八
卷八
江東凋瘵已還舒道路豺狼即漸除堂上若聞應更喜
便須勇敢莫躊躇

默齋

德行民孚可不言事親為學豈當然苟非審問兼明辨
安得躬行免厥愆

題鄧士要行齋

懇懇前修說踐形人生所貴不虛生直施超海挾山力
躍出功名富貴坑

塵務經營負夙心誤君千里辱相尋躬行別後多新得
為警疎愚寄好音

題白君悼硯

推仁及物古人能薄俗紛紛未省曾今日因君吟悼硯
使人多愧剡溪藤

君家石友研磨久快筆如風不可當已破何須留故事
乞來吾欲礪干將

卷首文奇足自賢卷中詩好總堪傳憑君莫嘆吟窓硯

失手風雲最可憐

題楊無已字說

為學先須識大同若為殊別萬無窮見賢能察相懸處
此是思齊第一功

義利昭然作兩途深知篤好半賢愚其間相去不容髮
舍已從人四字符

耆英圖為監憲容齋公賦

繆政堅持諫輔愁西師淪覆慟宸旒圖形妙覺諸元老

有酒應銷為國憂

題山水圖

岱宗一覽小天下川上形容道體深聖學何嘗廢山水
披圖頓覺啓靈襟

題清音圖

百折流泉萬疊山宛然琴意在冰紈古音不入秦箏耳
歸去巖阿和考槃

鵠

谷谷鳴鳩綠樹中
喚晴喚雨日無空
誰云此鳥生來拙
却是於人有大功

寬甫庭中

今年多陰菊事晚
相對共懷遲暮傷
只有幽人初不爾
待渠開日是重陽

耿老調恤詩卷

博施難周聖未怡
人人能恤庶無遺
忽思去歲東州道
糴米晨炊嘆不時

三月梅花

塵封吟硯動經時
百紫千紅不入思
可是萬堆濃綠裏
嬌黃幾點費人詩

只道濃春醉海棠
也來閒處發幽光
常年虐雪襲風裏
今對輕雲暖日香

微香澹澹日遲遲
冶蝶游蜂總不知
畢竟爲花那用爾
幽人相對儘相宜

苦雨顛風夜夜寒
此花原自耐摧殘
世間萬事乘除裏

金少府詩集卷八
卷八
妨却騎牛醉牡丹

忠宣公葬後大雪呈嗣侯彥瞻

輶軒至止旱塵昏
斬版俄驚玉海翻
應是天心表清白
故將縞素裹郊原

生有勲庸沒有知
為霖真合似當時
只應田父謳歌處
重感君侯罔極思

春雪

曉看萬象變瓊瑤
回首風吹日炙銷
可是青紅太相迫

不容潔白暫終朝

送彭丈東歸

驚風已折鶴鵲枝又到諸郎埋玉時
忽憶西河尊酒夜龍鍾東去淚如絲

送張祐臣

得得清篇為起予飄飄高氣在雲衢
錦囊又有游梁賦爲問舟軒安穩無

送楊仁卿

病中時幸數相過晤語常慳醉語多又爾忽忽成遠別
經旬作惡奈余何

阡表刊來衆已推聖門語孝有成規顯揚直待傳千古
他日重看第二碑

舍生取義豈論貧一士能令氣必伸敢嘆悠悠非族類
如君尚有白頭新

送從善

龍尾由來不世資選鋒危及困支離暮年方寸羣疑塞

抵頂微言復幾時

送王叔衡

阿衡我愧未論交
籍籍親知衆口褒
且道躬耕官滿日
去人何啻九牛毛

謝竹

荒齋觸目但蓬蒿
能致此君非俗交
合著新詩答清貺
一軒晴日看風梢

簡飛卿從善

桑如翠葆甚如飴大麥生仁豆角成秣馬仍多花苜蓿
肯來相對話平生

簡何淵甫

曾約終南最上層重陽携酒泛金英比年屬有期功慘
今歲能無續舊盟

漫學途中曳尾龜不堪多病忍長饑何侯有粟無從貸
憑仗新詩往問之

秋江送客圖

憂雨憂風亦等閒
若為沙岸久盤桓
關情別有無聲句
憶著分明下筆難

生朝有感

歲歲今朝誨諭深
一回記憶一霑襟
人情底是真誠處
只有耶娘愛子心

全家語笑記喧闐
應爲雙親有所憐
昔是嬌兒今白首
此生無復似當年

光陰最好悔空過
歲晚徒成感痛多
安得此身常幼稚

却教翁媼久婆婆

人年老大忌童心我獨哀吟孺慕深生死有常安得諱
兒從父母喜何任

都為當時歡愛極而今哀苦却無窮迂疎何以慰泉下
只有臨深履薄功

奉告娛親七字符趨時竭力莫求餘當知父母看兒喜
妻子孫曾總不如

自警言

天道生生日日新何嘗事外役精神遽廬一託都能幾
兩字將迎老却人

晨起

連年昏嫁苦相尋想見蕭蕭雪滿簪身世相忘吾豈敢
老來看鏡自無心

四皓圖

漢興四海悉來臣所不能招獨四人平昔若無高仰義
憑誰救得數彝倫

草蟲

鳴暑號寒猶有取穿花點水復何功
齧桑害物尤為甚
大化都均長養中

哭殤女

襦纈經旬始出城怪來問我苦丁寧
匆匆五日冥然臥
便隔終天不復形

日來侍食省衣裳一月俄成七月殤
嬌小未能知自愛
枉將性命託耶孃

攻虛邪勝莫如何災怪從生理則那應是剛柔成反易
百年慙痛淚滂沱

兄弟由來手足情弟號兄哭不堪聽哭聲有盡哀無盡
我亦神游到九冥

團頭弟妹哭無休洵洵情瀾不我由起欲撫摩云得得
浩然聲淚莫能收

蕭然哭罷似忘形恍見窓間自寫名莫道情鍾惟我輩
何人父子不鍾情

至性能憂病母孱煮湯合藥戒多餐誰期老樹翻全活
橫著風霜殞穉蘭

讀得班姬女戒篇略通一二未精研小心長恐耶孃怒
不待知書自可憐

鍼艾無痕耳未穿却應惟汝得歸全恩深責重寧無謂
不枉兢兢十四年

為締為綌豈曾厭治繭治絲察米鹽世上芬華都未識
敢論富壽得雙兼

畏儉慈祥慧且和歲時助奠益無譌若為不得終天命
應是耶孃積釁多

精神灼灼鏡奩邊風骨亭亭只眼前不記黃壚成異物

猶期白日結飛烟

原注吳王小事
見白傅詩自注

年來多病不禁愁何物人間是帝休覽鏡忽焉成太息

潛然涕淚應時流

原注帝休木名
主不愁見本草

人云相業與醫方能致生民不夭傷自悔半生工畫餅
不知精力事炎黃

堂前手植射干花著子盈房汝已化平來歲花開應更
大繞叢準擬百長嗟

秋雨琅琅玉線垂忘情看雨復深思數漚起滅隨黃潦
亦有委蛇得許時

哭劉參政

去秋臥疾再經時豈料俄成永別期不見迎門笑相迓
人間寧有石腸兒

詞

鵲橋仙

壽詞

萬金寶劑三山僊島祝康寧壽考似君全福幾人能
真不是天公草草綵衣膝下清歌雪杪莫厭金荷倒祇
應龜鶴羨長年八十歲靈椿未老

太常引

壽詞

天家崇德報元功稽盛典極追隆美謚亞三公更大國
新開魏封夫人配德淵深玉粹麟趾見清風恰恰壽
筵逢想醉德多於酒釀

浣溪紗

張詳識八十壽

紅藥香中敞壽筵一叢蘭玉拜尊前
曾孫繞膝慶高年
白髮弟兄真樂事雪溪孝友即家傳
人生佳處只君全

望月婆羅門引

叔經宣慰壽

城南佳處問誰人得數登臨看公鐘鼎何心鳳味東邊
小築桃李作高林道詩書教子絕勝黃金 千年尚禽
肯隨世漫浮沈好在傳家棠樹培壅清陰年高德劭似

一日春光一日深青鏡裏白髮休侵

